

**Här Claude Wiseler
President vun der Chamber**

Lëtzebuerg, de 20. Mäerz 2025

Här President,

Esou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un den Här Educationnsminister weiderzeleeden.

Zu Lëtzebuerg spillt den Instituteur spécialisé dans la scolarisation des élèves à besoins éducatifs spécifiques (I-EBS) eng zentral Roll an der Ënnerstëtzung vu Schüler mat spezifesch Besoinen. Et ass eng wichteg Initiative, déi d'Schoulinklusioun fërdert. Allerdéngs feelt et un enger detaillierter Beschreiwung vun de Missiounen vum I-EBS, déi et erlabe géif, dës mat den zentrale Kompetenzen vum genannte Studium ze vergläichen.

D'Inklusioun an d'Förderung vu Schüler mat spezifesch pedagogesch Besoinen stellen eng essenziell Erausforderung am Bildungssektor duer. Fir d'Léierpersonal op dës Missioun virzebereeden, ginn et ëmmer méi spezifesch Studiegäng, wéi zum Beispill an Däitschland wou et e Curriculum am „Lehramt Sonderpädagogische Förderung“ gëtt an et wäerten secher ëmmer méi ginn. Dës Formatiounen leeën e besonneschen Akzent op d'Didaktik an d'individuell Förderstrategien, fir d'Schüler beschtméiglech an hirer Entwécklung ze ënnerstëtzen.

An deem Kontext wéilt ech folgend Froen un den Här Educationnsminister stellen:

- Wéi e Profil gëtt fir d'Rekrutéierung vum Personal beim I-EBS gesicht? Wéi eng Qualifikatiounen a Kompetenzen ginn erwaart?
- Kann de Minister eng detailléiert Beschreiwung vun de Missiounen vum I-EBS zur Verfügung stellen, déi et erméiglecht, dës mat Curriculum vu Studiegäng ze vergläichen?
- Ass et méiglech fir Léit mat Ausbildungen an der sonderpädagogescher Förderung, déi op d'Herausforderungen vun Didaktik a Pädagogik an der Schoulen ausgeriicht sinn, sech op Poste vum I-EBS ze mellen?
- Wéi vill Mataarbechter sinn aktuell als I-EBS beschäftegt, an ass geplangt, dës Unzuel an Zukunft ze erhéijen?

Här President, ech bieden Iech dës Froen, mat mengem déifste Respekt unzuhuelen.

A handwritten signature in blue ink, appearing to read 'Ricardo Marques', with a large, stylized initial 'R' and a horizontal flourish extending to the right.

Ricardo MARQUES
Deputierten



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro
Nr. 2122 vum honorabelen Deputéierte Ricardo Marques**

Fir den direkten Accès an d'Funktoun vum spezialiséierten Enseignant fir Schüler mat spezifesch Besoinen (I-EBS) muss e brevetéierten Enseignant zwee Déngschtjoer ab der Nominatioun als Fonctionnaire an der ëffentlecher Lëtzebuergescher Grondschoul absolvéiert hunn an ee Master kënne virweisen, deen a Relatioun mam Begleede vu Schüler mat spezifesch Besoinen steet. Dernieft ginn, wéi fir d'Agente vun der Fonction publique virgesinn, d'Mechanisme vum Changement de carrière applizéiert an esou kënnen déi genannte brevetéiert Enseignantë mat mindestens 10 Déngschtjore via de Mechanismus vun der Carrière ouverte respektiv déi mat mindestens 15 Déngschtjore via de Mechanismus vun der Voie expresse an d'Funktoun vum I-EBS wiesselen.¹

Den Aufgabeberäich vun den I-EBS ass am Detail am Artikel 27 vun der *Loi modifiée du 6 février 2009 portant organisation de l'enseignement fondamental* festgehalen an ëmfaasst prioritär (während 23 Schoulstonnen an der Woch), am Kader vun enger inklusiver Approche, d'Betreiung an d'Ënnerstëtzung vu Schüler, déi Léierschwieregkeeten hunn oder sozial an emotional Bedierfnisser opweisen. Et ënnerläit dem I-EBS, an Zesummenaarbecht mam Schoulcomité an der Regionaldirektioun, d'Bedierfnisser vun der Schülerschaft ze ermëttelen an d'Mesuren, déi sollen ëmgesat ginn, un dës Bedierfnisser unzepassen.

Aktuell intervenéieren 158 I-EBS an de Regierungsprogramm gesäit vir, datt d'Unzuel vun den I-EBS am Laf vun dëser Legislaturperiod soll erhéicht ginn.

Lëtzebuerg, den 18. Abrëll 2025

De Minister fir Educatioun,
Kanner a Jugend

(s.) Claude MEISCH

¹ *Loi du 25 mars 2015 fixant les conditions et modalités de l'accès du fonctionnaire à un groupe de traitement supérieur au sien et de l'employé de l'Etat à un groupe d'indemnité supérieur au sien (carrière ouverte)* an Artikel 54 vun der *Loi modifiée du 25 mars 2015 fixant le régime des traitements et les conditions et modalités d'avancement des fonctionnaires de l'Etat (voie expresse)*.